



Komunikadu Imprensa
Tribunál Distritál Dili
11 Abril 2017

**JSMP kongratula Ministériu Públiku no Tribunál Distritál Dili ne'ebé konsidera ko-autór
iha krime infantisídiu**

JSMP kongratula Ministériu Públiku no Tribunál Distritál Dili ne'ebé akuza no kondena arguidu *ko-autor* ba krime infantisídiu iha kazu ida ne'ebé akontese iha 13 Abril 2016, iha Munisípiu Dili. Kazu ne'e julga no konklui iha 27 Feveireiru 2017.

JSMP konsidera katak ne'e progresu imporante ida tanba iha kazu barak, normalmente Tribunál sempre akuza no kondena úniku arguida ne'ebé nu'udar inan iha kazu infantisídiu sira.

Tribunál prova katak arguidu FMI tenta influensia ho maneira oiain no obriga arguida MdA halo abortu desde arguida isin rua to'o partus. Durante arguida MdA isin-rua arguidu FMI obriga arguida MdA hemu no han buat ne'ebé iha potensia no efeitu atu halo abortu, no fó presau ba arguida.

“Desizaun ne'e manifesta sensibilidade forte hosi autór Tribunál sira tanba durante ne'e prátika judisiál hatudu tendénsia atu kriminaliza deit arguida nu'udar inan iha krime infantisídiu sira sein konsidera sirkunstánsia no presau psikolójiku estra-ordinariu ne'ebé inan sira enfrenta,”dehan Luis de Oliveira Sampaio, Diretor Ezekutivu JSMP.

Iha atualiazaun justisa ne'ebé JSMP pública ona ho titulu *Fenomeno krime infantisídiu presiza transforma mekanismu no esforsu kolektivu ba prevensaun**, JSMP subliña importánsia kona-ba prevensaun ba krime infantisídiu. JSMP hanoin katak Tribunál tenke konsidera ko-autór ne'ebé fó isin-rua ba fetu. JSMP fiar katak naturalmente la iha inan ida mak independentemente halo desizaun atu oho nia-oan rasik sein influénsia hosi ka simu presau hosi nia parseiru.

Ministériu Públiku akuza arguidu kontra artigu 32 (1) Kódigu Penál (KP) kona-ba komplisidade hanesan ema ne'ebé dolozamente fó ajuda materiál ka morál ba ema seluk atu prátika krime ruma no artigu 32 (2) aplika ba ilísitu nia tipu ho atenuasaun extraordinariu no artigu 142 KP kona-ba infantisídiu.

* JSMP nia website http://jsmp.tl/wp-content/uploads/2012/06/JusticeUpdateKrimeInvantisidio_Tetum.pdf

Enkuantu ba arguida MdA Prokuradór akuza kontra artigu 142 KP kona-ba infantisídiu ho moldura penál husi tinan 3 to'o 10.

Prokuradór akuza katak iha tinan 2013, arguida (MdA) ho arguidu (FMI) iha relasaun namoru. Iha Agostu 2015, arguida (MdA) hateten ba arguidu (FMI) katak nia isin rua. Wainhira rona informasaun ne'e, arguidu (MdA) haruka arguida atu halo abortu tiha. Iha 13 Abril 2016, iha tuku 01:30 madrugada, MdA sente nia atu partus no telefone fó hatene ba arguidu (FMI) hodi lori nia ba ospitál maibé arguidu lakohi no haruka atu buti mate bebe ne'e kuandu bebe moris. Iha tuku 04:00 madrugada, arguida tama ba iha haris fatin no partu bebe fetu ida. Arguida mós telefone ba arguidu (FMI), maibé arguidu kontinua insiste arguida MdA atu oho tiha bebe ne'e no soe tiha ba iha mota laran. Tanba ne'e, arguida MdA lori bebe ninia tali husar kesi tiha iha bebe nia kakorok, rasta dala 3 no buti tan bebe nia kakorok to'o bebe mate.

Iha julgamentu, Arguidu FMI rekoñese katak nia namora ho arguida no halo relasaun seksuál dala 8 maibé la hatene wainhira arguida isin-rua. Arguidu deklara katak nia hakfodak wainhira simu telefone husi arguida katak atu partus. Iha momentu ne'ebá, arguidu la bele ba hasoru arguida MdA tanba uma ne'ebé sira hela portau xavi metin ona no rekuza total faktu sira ne'ebé arguida deklara iha leten.

Iha parte seluk, arguida MdA deklara katak nia la kesi bebe nia kakorok ho bebe nia husar. Nia rekoñese katak nia buti deit iha bebe nia kakorok to'o mate, no falun bebe ho hena ida no hakohi iha rai lolon. Arguida mós rekoñese katak nia iha relasaun namoru ho arguidu no halo relasaun seksuál dala 8 to'o isin rua.

Arguida hatutan katak, wainhira arguidu FMI rona arguida isin rua, arguidu FMI sempre haruka arguida atu halo abortu tanba arguidu sei eskola. Arguidu mós haruka arguida hemu tua, hemu ailia, han ainanas no hemu aimoruk abortu. Arguida konsume duni buat hirak ne'e maibé la konsege abortu. Arguida mós deklara katak arguidu FMI sempre tuku nia kabun ho objetivu atu halo abortu maibé la konsege.

Depoide avalia no konsidera faktu sira ne'ebé prodús durante julgamentu Tribunál kondena arguida MdA ho pena prizaun tinan 4 no arguidu FMI nu'udar ko-aútor ba krime infantisídiu ho pena prizaun tinan 4.

Julgamentu kazu ne'e prezide husi Dr. Dr. Eugebio Xavier Vitor, Dra. Ana Paula Fonseca no Dra. Jacinta Correia da Costa. Ministériu Públiku reprezenta hosi Dr. José Elu no arguidu no arguida hetan defeza hosi Dr. Rui Manuel Guterres hosi Defensoria Públiku. Kazu ne'e rejista ho Nú. Prosesu: 0081.16/PNSIC.

Atu hatene informasaun liutan bele kontaktu:

Luis de Oliveira Sampaio
Diretór Ezekutivu JSMP
Direasaun e-mail luis@jsmp.tl